

閩川閨秀詩話

閩川閩秀詩話序

晉安風雅一事自鄭荔鄉先生有全閩詩話林蒼巖先生有榕海詩話此後繼響無聞而閩媛一門則並未有涉筆者余同堂兄蔭林中丞公著作等身尤畱意梓邦故實嘗輯唐以來閩川詩鈔數十卷並仿秀水朱氏明詩綜之例間綴詩話而於國朝諸詩事尤詳已有十二卷成書意欲先爲脫稿單行嘗以閩秀門屬余任之余家藏書不多閩中見聞寡淺何足以裨益吾兄但旣承諄諄重委所不敢辭爰就同時親串諸家耳目較近者詳加採訪錄寄吾

兄以資編附時吾兄就養東甌郡齋多暇已將闢秀一門
按先後次成四卷先付梓人承以稿本寄余讀之竊歎吾
鄉名媛舊有詩名於世者以鄭荔鄉家爲最盛今則吾家
自王太夫人許太淑人以下亦有十餘人足與荔鄉家後
先輝映爲閭里榮而編中所附錄朱梅厓魯秋塋汪瑟菴
林樾亭吳清夫陳雲伯諸先生傳序皆洋洋名篇尤足增
重則是書且當傳之不朽而余之得附名簡末有餘幸矣
適吾兄命爲弁言敬述其顛末如此時道光己酉初春同
堂妹歸許門梁韻書蓉函氏拜手謹書

閩川閨秀詩話目錄

卷一

林玉衡

陸眷西

蘇世璋

林蕙

魏鳳珍

吳絲

林文貞

徐氏

俞若耶

方琬

權氏

林英佩

王巧姐

陳氏

阮氏

鄭氏

周仲姬

楊氏

石氏

嚴氏

姚鈴姑

毛秀玉

余珍玉

余尊玉

林瓊玉

陳玉瑛

邱卷珠

宋芳斌

蘇芳濟

黃幼藻

黃幼繁

鄭孟姬

莊九畹

張季琬

莊氏

許琛

林氏

吳荔娘

卷二

黃淑宛

黃淑琬

游合珍

林瓊玉

廖淑籌

林瑱

林蕙圃

鄭徽柔

鄭翰萼

鄭鏡蓉

鄭雲蔭

鄭青蘋

鄭金鑾

鄭詠謝

鄭玉賀

鄭風調

鄭永紉

林芳蕤

林淑卿

何氏

陳于鳳

黃淑庭

吳素馨

許德馨

許蘅

李若琛

姜氏

力氏

薛夢川

廖氏

卷三

王太夫人

許太淑人

鄭夫人

梁符瑞

梁韻書

梁秀芸

周蕊芳

梁蘭省

梁蘭臺

楊漢皋

梁賦茗

梁蘭芳

梁金英

梁佩汪

梁瑞芝

卷四

許福祉

何玉瑛

鄭瑤圃

陳若蘇

洪龍徵

陳端璧

張如玉

張嬌娥

江鴻禎

汪淑端

鄭嗣音

王瓊瑛

李鏡林

許還珠

許季蘭

林炊瓊

趙玉釵

劉簪林

齊祥棣

楊漢好

沈穀

閩川閨秀詩話卷一

福州梁章鉅撰

林玉衡

林玉衡字似荆前明舉人初文女詩人林茂之先生

古度

之妹歸倪方伯之孫廷相七歲卽能詩初文建小樓落成
值雪後月出樓前梅花盛開命之吟應聲賦云梅花雪月
本三清雪白梅香月更明夜半忽登樓上望不知何處是
瑤京長老傳誦皆爲驚歎

陸眷西

陸眷西字初月莆田人詩人余澹心懷側室也工吟詠今

惟存憶西湖絕句一首云曾記西湖六月天藕花如錦斷
橋邊至今夢裏猶來往聽慣錢塘喚小船見莆風清籟集
此外則並無剩句余鈔國朝吾鄉先輩詩以林茂之余
澹心二家冠集今鈔閩秀詩復得林余二家眷屬遺篇仍
以弁諸卷端亦佳話也

蘇世璋

蘇世璋字文圭漳浦人歸海澄公黃立齋有瑞圃詩鈔過
富春渚云解纜富春渚清晨展游眺遙山雜雲霧逝湍見

奔峭迢迢千里帆，緬邈區中妙碕岬。紛叅錯赤亭山，照耀
渚至殷殷雷。翻浪聞叫嘯，涉險抱中孚。風濤不能剽，宵濟
漁浦潭。飛泉媚孤嶠，芳林攀落英。野曠沙垠渺，中懷得昭
曠。外物何其小，臨流發長吟。雁柱音杳杳，閨閣中獨能學
選體。亦別調也。又秋柳用王漁洋韻。云深秋裊裊最堪憐。
一望平蕪雜暮烟，枚叔不逢空旖旎。小蠻欲別尙纏綿，將
軍舊壘傷今日。帝子長堤憶昔年，爲想五株陶令宅。西風
搖曳夕陽邊，則又學新城風韻矣。

林蕙

林蕙字佳英泉州人所著有香咳集詠蘭花云春山隨意
佳雨過香初足美人在何許不語倚空谷此二十字爲郭
韶溪學正所述韶溪言其家舊有香咳集殘本許爲錄副
見寄余屢索之不獲見今韶溪亦墓有宿草此集蓋不可
復得矣

魏鳳珍

魏鳳珍字友梧侯官人舉人英妹歸諸生李聯芳有紅餘
小草詠韓侯釣臺云韓侯臺上秋雲陰韓侯臺下秋濤深
英雄不遇出胯下感恩一飯酬千金登壇一呼楚軍竄山

河萬里全歸漢丈夫生不爲眞王欲借王名却疑叛君不見走免死獵狗烹識時勢者全功名功高不免殺身禍何不垂釣終平生慷慨激昂在香奩中頗不易得

吳絲

吳絲字黃絹莆田人閨秀正始集云吳絲爲威略將軍英女欽牧室將軍幼爲海寇所掠投誠後以功累遷至水師提督賜作萬人敵扁加號威略將軍性喜吟咏黃絹其愛女也親課之詩有過鶯脰湖絕句云風光淡淡晚涼天遙望漁家夕照邊傍岸綠陰藏釣艇一竿秋水半湖煙將

軍爲倩人寫作便面

林文貞

林文貞字韞林莆田人歸王安明有韞林偶集嘗隨宦山
左暮春濟甯道上得句云老樹深深俯碧泉隔林依約起
炊烟再添一箇黃鸝語便是江南二月天有依此詩景繪
一便面者韞林曰畫固好但真添箇黃鸝便失我言外遠
情矣

徐氏

徐氏莆田人同知龐女閨秀正始集稱其長於史學有二

十一史評宋比玉爲之傳今俱未見有秋日憶姊詩三首
頗有古意詩云日夕郡樓上望遠意悠悠四顧何蕭清不
覺萬物秋噓噓雲中鳥翩翩呼其儔鬱鬱庭前柯凌霜枝
相樛因之懷同氣憑軒獨夷猶夷猶何所見惻惻使心傷
推窗睇衆星渺渺夜何長感時起百憂悵然懷故鄉况復
高秋夕兩地遙相望相望隔天末執手在何年生平懷壯
志懷古期前賢雖在閨閣中舉筆心無邊棣花不復覲此
意與誰傳願爲雙脊令寥廓同聯翩

俞若耶

俞若耶莆田人少學詩卽能驚其儕偶及長詣愈進愛讀
才調集有擣衣詩云玉樓人去幾時還夜夜寒砧不放閑
最是烏啼天欲曙一聲殘月滿關山欹枕詩云殘夜漫漫
月一鉤獨欹孤枕作離愁幾回夢醒思拋却錯繡鴛鴦在
兩頭睡起詩云朝朝睡起不勝春強倚闌干託此身暗數
落花渾是恨容華消損爲何人

方琬

方宛玉早寡撫孤守節以終所存詩無多寄從姊佩青云
可憐懷袖字已是淚痕多老姑病篤祈天請代云頻將血

淚拭恐動見時憐避亂舟中寄弟云喪亂相依吾弟在艱
危無奈老親憂語語真摯可以想見其人聞有斷釵集已
梓行覓之不得僅從莆風清籟集及國朝詩別裁集中
鈔出數首而已

權氏

權氏長樂人歸王德威以節終有閨中草長樂縣志云王
德威妻權氏未行夫得瘡疾兼患癰癰使辭婚氏曰事夫
婦職也焉有貳乃歸別居治藥餌三年而夫亡矢志撫嗣
子及五旬將沒忽微吟云結髮爲夫婦三年失所天五旬

猶處子且訂後生緣

林瑛佩

林瑛佩侯官人西仲先生

雲銘

女歸拔貢生鄭郊福建通

志云林瑛佩年十四未行父雲銘遭耿變下獄瑛佩匿其
弟於深山中藏利刃衣袖間以自防日饘饘粥餉父於獄
中母以驚怖成疾瑛佩刲股療之身任家務卒免父於難
聰慧工詩有秋夜寄夫詩云獨立秋風前細訴秋風知一
片離別情盡倩秋風吹吹與三山客孤窗夢醒時頗有古
意又有千里夢隨蠻水遠數行淚趁浙潮生之句著有懸

黎遺稿二卷

王巧姐

王巧姐閩縣人許嫁陳氏子未歸以烈終福建通志云巧姐自經時其父母於其懷中檢得願合葬陳家數字夫客東洋溺死父母秘其事初疑而不敢決也已而有欲委禽者則曰吾死已晚矣素能詩又善畫乃覽鏡自繪其影畱詩於上云數載深愁血淚輸早知形影逐時枯傷心未識陳郎面難畫人間舉案圖

陳氏

陳氏古田人歸林克仁早寡以節終福建通志云古田有
四節婦林克仁妻陳氏丁爨鼎妻藍氏李爲仁妻阮氏余
升標妻鄭氏皆能詩冰霜自勵每詠物以見志陳氏題畫
松云愛此後凋節森森不改柯凌霜還耐雪幾度歲寒過
爲時所傳誦

阮氏

阮氏古田人歸李爲仁以節終福建通志載其題畫雁詩
云長江潮落見平沙秋水連天一雁斜添箇雙飛成比翼
却愁踐踏到蘆花意在言外

鄭氏

鄭氏古田人歸余升標以節終福建通志載其題畫梅詩
云殘雪古牆陰山空夕照沈無糧偏有鶴相對守寒林葢
撫孤克有成立云

周仲姬

周仲姬字淑和龍溪人周忠愍之後歸李堯封有種竹示
兒句云虛心能破石轉眼已成龍讀先忠愍公傳句云後
死七人無復恨先生千載有餘悲有二如居集見福建通
志閨秀正始集云周淑和有寄潤玉詩云碧梧漏下秋霜

影猶是當年舊月痕俊逸可誦

楊氏

漳浦進士蔡而皖妻楊氏通星筭曉起有句云徑畱殘夜
月牕透落花風每一詩成而皖輒有愧色惜集佚不傳福
建通志云

石氏

漳浦石氏歸邱調元能詩夫亡撫孤作詩見志旣而歸甯
母欲奪嫁之拂袖徑歸有句云而今嬾作歸甯計再誦莪
蒿淚滿衣聞者哀之見漳州通志

嚴氏

嚴氏長泰人許字王氏子年十一忽自吟曰蒲葦紐如絲
磐石難轉移父怪問之曰得之夢中耳及于歸夫有惡疾
氏安之夫亡無子乃以烈終

姚鈴姑

姚鈴姑古田人歸林氏子所適非偶抑鬱以死詩散佚不
存有句云有水雙清月無雲一色天瓶蘭云清蕤莫恨秋
容澹稍得輕風便有香見古田縣志

毛秀玉

毛秀玉古田人歸林日詔嘗賦妾薄命云莫笑今生薄命
人與君白首共清貧挑燈漫讀朱公傳誰道詩書負買臣
見古田縣志

余珍玉 尊玉

古田縣志云余珍玉年十四詠竹有風掃庭前鳴碧玉月
臨樹裏伴瑤琴之句妹尊玉年十二詠菊有蕊含白種園
中玉英落黃鋪徑裏錢之句俱清麗可誦

林瓊玉

林瓊玉閩縣人黃莘田先生外孫女歸庠生陳澧早寡以

節終有悼亡詩云琅琅清夜讀書聲補綻曾分一角繁纔
得錦囊收賦草誰知君便薄浮生又示兒詩云閉門岑寂
雪霏霏慟哭人生百事非竟日薄餽難一飽可憐稚子倦
啼饑

陳玉瑛

陳玉瑛自號左芬侍史郭復齋明府

起元

之母書禪孝廉

雍

之叔母也有蘭居吟草書禪爲之手書梓行句如登臺
云風高征雁杳煙淨遠峯生春日云蕉雨迎輕翠松風掃
宿塵贈題壁女子云蝴蝶夢歸江草合杜鵑啼切海雲長

憶女云憑將離緒題桐葉忽動新愁賦菊花皆有中晚唐人風味惟余讀江右魯秋塋先生曾煜撰宜人傳云郭氏

三喪未葬宜人心傷之夜有贈以夢者眎穴在某地宜人驚寤他日買一婢立約予值聞其父哭甚知爲訟所屈立還其女毀約弗索值其人大感曰有屋後地可葬亟往視符夢中穴人以此竒之宜人束修其身誨人以善能化其庶姑黑氏之弗類者督其子復齋成名女二一以烈著一以節著孫以孝著又聞宜人善姑布子卿及李虛中術無有師授靜則生慧諒哉然則但以工詩爲宜人重者殆淺

之乎論宜人矣

宜人訓子詩有英華銷歇隨年去枯落堪傷奈汝何之句
自題小影云夙志依然忘鬢雪丹青豈易寫心田黃花入
眼秋風老閨督兒曹學古賢可謂賢母矣

邱卷珠

邱卷珠字荷香閩縣人諸生詹振甲側室早卒有荷窗小
草閨秀正始集云荷香與張蓮香藕香先後歸詹聲山
字^甲尋荷藕先後沒聲山乃合蓮香詩爲三生堂稿荷香偶
拾花瓣砌情字忽被東風吹去口占一首云爲情憔悴懶

言情聊把閒情寄落英香雨團成綠一縷雪泥證到夢三生芳菲已謝空憐惜飄泊難禁易變更好語風姨更吹聚前生原是許飛瓊五六句竟成詩識

宋芳斌

宋芳斌莆田人湖州同知萬畧女歸鞏昌太守林輝章有秋閨回文句云鴉飛玉鏡窺新黛鳳舞珠釵墜澹粧斜樹夜迷城月白暗沙秋入塞雲黃亦見巧思惜首尾聯音調未能悉協

蘇芳濟

蘇芳濟莆田人歸布衣俞孫侃有長春花截句云淑氣初
融日影斜巡簷小立惜芳華莫疑點染胭脂色開向東風
奪晚霞頗有言外之致

黃幼藻

黃幼藻字漢薦莆田人前明蘇州通判議女歸舉人林仰
垣爲儀部郎啟昌子婦有柳絮編已梓行鄭蘭陔莆風清
籟集錄其詩獨多並綴詩話云姚園客稱漢薦麗才雅藻
何減玉臺年未四十而卒臨終猶誦殘燈無燄影幢幢之
句可悲也宋比玉稱漢薦丰姿高秀少受業於老儒方泰

年十三四工聲律通經史知大節儀部沒家無餘貲盡心力以事其姑所居不蔽風雨近戚罕見其面年三十九患心病卒

漢薦有明妃曲云天外邊風掩面沙舉頭何處是中華早知身被丹青誤但嫁巫山百姓家見甫風清籟集鄭蘭陔云此詩亦見黃米軒集惟起二句稍異然詩意婉約自是香奩中語今從明詩綜明詩別裁諸選錄之

黃幼縈

黃幼縈字漢宮幼藻妹有詠月詩云清切空階月相依到

深更喧寂非一致千秋同此明蕭蕭庭中女俯仰關中情
到此令人遠況乃兼秋聲人生有代謝萬彙有衰榮茫茫
天地中相積爲愁城欲挽西江水一洗襟懷清問月月不
語清淚落寒檠字字老成不似閨房凡響

鄭孟姬

鄭孟姬爲魚門中丞

任鑑

之女歸晉江許明經臣驥翼城

令崇楷之母博羅令懿善之祖母也早寡以節孝受旌

復以崇楷官

贈孺人建甯朱梅崖先生

仕琇

爲之傳云

孺人父魚門先生由巡撫罷官畱修湖北城孺人捐產業

衣飾得白金二百斤助費先生得歸孺人因攜子女從父
居侯官而棄其田廬之在晉江者盡與夫昆弟泉州知府
義之書門曰巾幗君子每歲依古方以善藥製丸散濟人
冬則作絮衣數十貽婚親之無衣者家旣日貧偶念族有
男女二人流落異鄉適子崇楷自粵寄金數斤遂以贖之
時孺人乏糧已數日矣其好義如此孺人聰明剛毅能斷
大事其於文學天性也尤熟諸史工詩能書畫崇楷童試
督學取附侯官籍諸生訟之除名孺人赴訴轅門官令具
牒孺人輿中出紙筆手書數千言各得條理觀者驚嘆夫

病陰剗股肉以進有責其毀傷者泣曰寡婦稱未亡人夫
萬一不幸當以身殉豈惜此一股之癢哉言者無以奪也
存詩不多僅從舊本中鈔得二首卽目云新竹如柳垂弄
影清池上幽禽偶一棲亞枝作微響見人已高飛焉能識
所往秋夜云暑退衣單薄醉醒流光荏苒度流螢片雲忽
暗庭前樹一夜秋聲帶雨聽雖着墨無多而具有氣格嘗
從其曾孫蔭坪廣文訪求遺稿不可得也

莊九畹

永福莊蘭齋字吳暉亦黃莘田先生戚末也未婚而寡以

節終有賀莘田先生重宴鹿鳴詩云江夏無雙有夙因耆
年雋望照騶閭早書淡墨魁時彥老把金丹度後人北海
文章留不朽東山絲竹寫其真大羅盡有鈞天響也許皇
琴籟後塵聲韻俱足忘其爲巾幗中詩也著有秋谷集莘
田先生爲之序

張季琬

閩縣張宛玉能詩尤工繪事題畫蝶詩云蘧蘧飛過宋東
家春去何心戀落花畱得滕王新粉本小牕只當寫南華
題畫不卽不離出之閨媛尤爲難得宛玉歸金陵朱豹章

叅軍

文炳

自號月鹿侍史吾鄉人所熟聞而隨園詩話以

爲黃莘田妻與莘田同有研癢捕風捉影之談隨園老人
往往孟浪如此

莊氏

永福黃莘田妻莊氏能詩莘田下第游汴三載未歸莊除
夕寄外有萬里寒更三逐客七年除夕五離家之句見永
福縣志

許琛

乾隆間吾鄉閨媛之能詩者無過素心老人遇亦最苦婦

孺皆能詳其事素心名琛字德瑗甌香先生

友

曾孫女月

溪先生

遇

孫女灣門郡丞良臣之女也早寡以節終有疎

影樓稿已梓行閩中女士家有其書林樾亭先生爲之傳
足以傳素心矣傳曰節婦幼聰慧能詩工書畫隨父宦粵
許字同里何元祥之次子燧隆何故巨家饒於貲財海舶
往來諸夷島貿易遇風覆舶貲盡沒其家遂貧元祥之妻
早卒乃挈其長子光年及媳旅食於吳而使燧隆就婚於
粵時乾隆壬申節婦年二十有二燧隆素有勞瘵疾日從
事醫藥居二年卒節婦欲以身殉爲父母所持不果灰

父罷官歸節婦隨夫柩歸里何氏已無宅仍依父母以居
會光年有子立其次鐸爲嗣未幾父母偕沒節婦益困所
居許氏宅東垣外小樓一間一蓬頭老嫗應門執爨庭植
梅竹自扁其樓曰疎影日焚香觀書間展紙作畫自題小
詩其上先時節婦畫工花鳥草蟲至是乃專寫梅竹及寒
菊數枝具蒼辣疎古之致詩亦直攄胸臆不藻飾規撫以
爲工其素心之號亦自是始著也今湖北布政使陳公貴
州布政使汪公廣東瓊州府福公先後官閩其夫人皆耳
節婦名相與禮重結爲文字相知及去皆厚資之故節婦

藉以自給辛卯元祥卒於吳又數年光年父子相繼死鐸亦旋夭節婦乃大慟曰吾所以忍死三十年徒以翁及嗣子耳今俱已矣姑之柩權厝荒山已四十年翁柩復在吳誰當爲營坏土者因出所資贈餘金買地治具馳書於吳促其姒扶翁柩歸與姑合葬又爲燧隆治冢而虛其右穴以自待土石之費不足則盡鬻衣釵圖書之屬以成之葬之日髻經登山哭踊復土僅煢煢一弱婦匠役及山旁居人聚觀交口稱歎有爲之隕涕者旣復念祭掃無人邱隴終不可保則寫梅竹一幅系以一詩贈山人劉長宜而託

之守墓有竹梅聊當子孫賢語見者哀之於是節婦年五十九矣善病時起時卧卽詩畫亦不常作云論曰許氏代以詩畫仕宦顯其家七世同居聞於 朝遂獲邀 御製詩及 御畫扁額之褒節婦之於詩畫固濡染者深而其能持大節亦無媿義門世範哉余嘗從容語今巡撫徐公欲爲之請 旌且謀置嗣節婦聞之愀然曰吾甯不抱不祀之痛哉顧何氏子姓凌替孰可嗣者且吾爲何氏婦不及事吾姑翁復遠客於外吾未嘗致一日之養又不能撫孤子以成偷生視息愧憾多矣尙奚足邀 朝廷盛典乎

亟爲吾謝大人及聞余將爲之傳則又曰吾卽死瞑目矣
嗚呼是尤可悲也已

林氏

林氏莆田人有賀黃莘田先生重宴鹿鳴詩云丹桂花開
六十秋振衣又到廣寒游嫦娥細認曾相識前度人來竟
白頭別出手眼爲一時所傳誦

吳荔娘

吳荔娘莆田人秀才陳蔚之妾早卒有蘭陂剩稿隨園詩
話云莆陽有吳荔娘者庖人之女也性愛潔而能詩陳豹

章聘爲旁妻未三年卒豹章爲寫其蘭陂刺稿有春日偶
成云瞳矓曉日映窗疏荏苒韶光一枕餘深巷賣花新雨
後沿門插柳嫩寒初鶯兒有語遷喬木燕子多情覓舊廬
那用踏青郊外去芊芊草色滿階除又詠牡丹句云國色
日來描不得世人空自費胭脂又題吳興女士嚴靜甫墨
竹句云我爲丹青先比較此君風韻却輸卿皆從題外設
想運筆自是不凡

閩川閨秀詩話卷二

福州梁章鉅撰

黃淑宛

黃妣洲爲莘田先生愛女莘田先生壽登八十重宴鹿鳴
吾鄉先輩以詩賀者名篇甚夥同時閩秀亦有作妣洲一
律爲時傳誦實不媿爲香草齋後人也詩云人間一第比
登天誰識天仙又地仙接席簪裾多後輩稱觴兒女也莘
顛姓名千佛標真誥 恩禮三朝寵大年韻事如斯關掌
故詎徒家慶譜新編

黃淑畹

紉佩爲莘田先生次女與姒洲同承庭訓於詩工力尤深
杭堇圃榕城詩話祇錄其題杏花雙燕圖二絕句此外佳
什尙多如春陰云朱戶半扃人語碎粉廊回合鳥聲多殘
月云坐久不知更漏盡滿天涼露濕輕紗梅花云風定月
斜霜滿地西廊人定一聲鐘又云只恐笛聲吹落去不如
移入膽瓶看刺桐花云最好斜陽雲外透綠陰牆角簇猩
紅皆清麗可喜而游鼓山句云負郭礮田春水綠隔江畫
舸夕陽紅尤堪入畫也

游合珍

游合珍爲黃姒洲女莘田先生之外孫女也亦能詩有賀外祖重宴鹿鳴詩云松筠標格鶴精神白髮簪花作瑞人六十年來典型在新嘉賓拜舊嘉賓

林瓊玉

林瓊玉亦莘田先生外孫女早寡以節受旌閨秀正始集云瓊玉爲女史黃紉佩女綽有外氏家風寄許德瑗表姊云疎影樓頭問起居邈來詩思復何如知君多爲梅花瘦我比梅花瘦有餘與素心老人可稱同調

廖淑籌

廖壽竹爲林來齋先生女出繼廖氏歸禮部郎許雪村先生均陳畱令月溪子婦也閨秀正始集稱其隨舅宦陳畱時會官署災先擁護其小郎小姑而後及其子夫卒歸里困躓無以爲生乃寫花竹以自適課子孫讀書有清時紆誦重廉吏子孫貧句爲時傳誦

廖壽竹有渡仙霞嶺句云地虛編竹補山斷借雲連寫景維肖其貧甚遣兒子東游詩云先人長物本來無只把遺經付阿奴清白兒孫今至此衰年看汝作饑驅羞澀言詞

未易陳二三君子是周親何妨懸罄頻頻說汝父貧交有
幾人令人酸楚不忍卒讀

林 瑱

侯官林瑱字自芳爲天玉廣文之妹歸謝廷詔早寡以節
孝受 旌陳秋坪先生云孺人有詩數十章五十年來未
嘗問世今年近七旬白髮皤皤身受 旌典其嗣子善垂
始衷集以示人人亦始知謝家婦之能詩也今按所刻名
自芳偶存後附哭夫文一首讀之酸鼻病中答琳芳三妹
云舒繡窗前別歸來病已纏幾番分藥餌空復費金錢蓮

予心同苦梅花骨自堅抱疴吾久耐勸爾莫憂煎友愛之情溢於楮墨又端陽感賦云屈騷讀罷讀曹碑弔古心懷往事悲難得千秋成案在忠臣孝女沒同時亦見思致

林蕙圃

林蕙蘭侯官人歸黃明經

漢章

余久聞黃明經之室人蕙

圃能詩明經祇爲余誦其燈下懷母氏一首云母生我廿年我離母兩月可憐咫尺間便如天壤闊夢寐不能忘嗟嗟及明發遙知此時情孤燈照白髮益亦深於天性者惜未獲讀其全稿也

鄭徽柔

鄭徽柔字靜軒建安人固安令善述女兗州守荔鄉先生

方坤

之姊也母黃氏曇亦能詩歸陳日貫早寡以貞壽得

旌表有芸窗寒響集靜軒與黃莘田先生爲中表親故
集中有賀莘田表弟重宴鹿鳴詩云手執異人斫桂之玉
斧足踏大海駕柱之鰲頭路傍觀者互嘖嘖是何慘綠年
少真風流中年作宰不稱意牛刀小試高人羞拂衣歸里
且却掃溪山詩酒此外復何求以茲葆光養性享大壽鬚
眉如雪明雙眸 朝廷有詔待國老大袍都紵杖則鳩與

新郎君旅進退重聽鹿鳴之呦呦倜儻不凡可以想見其才調矣

鄭翰萼

鄭翰萼建安人字秋羹承其父新繁令石幢先生

方城及

叔父荔鄉先生之教以通詩禮名家歸山陰令林培根先

生

其茂

以內政佐其循聲早寡自課其二子皆有令名稱

於世卽樾亭香海二先生也所著帶草居詩集畫荻編尙

未梓行有歸舟次建安二律云風木有餘恨音容都渺茫

綠痕綠舊壁

綠痕書屋爲先君宴息處手書扁額猶存

墨瀋賸殘香遺照三年

淚虛廊五夜霜淒涼今日返不見出扶將往事同棋局吾
生類聚萍關山多阻隔親故半凋零去棹波偏急澆愁酒
易醒誰知別後意哀雁落寒汀神韻蒼涼是玉臺中別調
培根先生令山陰不名一錢去官後家計蕭條但剩殘書
兩簾而已而太安人處之恬如暮春感懷云几有殘書堪
課讀家無長物不知貧又送春絕句云殘春去地恨無涯
狼藉誰憐舊綺霞不忍看他零落盡爲伊細細護根芽如
此襟期林氏之興宜其未有艾矣

鄭鏡蓉

鄭鏡蓉字玉臺建安人荔鄉先生之長女歸陳文思爲文
安令衣德子婦早寡以節終得旌表有垂露齋集泡影
集荔鄉先生一門羣從風雅蟬聯膝前九女皆工吟詠長
卽鏡蓉次雲蔭字綠萼三青蘋字花汀四金鑾字殿仙五
長庚闕其字六詠謝字菱波又字林風七玉賀字春盎八
風調字碧笙九永紈字亦未詳九人中惟永紈未嫁而殤
長庚詩無可考餘則人人有集荔鄉先生守兗州時退食
餘閒日有詩課拈毫分韻花萼唱酬有垂露齋聯吟集自
古至今一家閨門中詩事之盛無有及此者近人撰閨秀

正始集但云先生四女能詩所登又僅玉臺花汀兩人詩
殆未之詳考耳

玉漁洋秋柳詩當時閨秀和者至數百家惜無好事者爲
之編輯成書吾鄉鄭玉臺亦有和作云遣愁何處寫詩魂
節序驚心白板門斜日寒塘畱故態秋風涼露卽啼痕長
條有意縈歸舫暮色無端黯別村爲惜當時眉樣好臨風
惆悵與誰論蟬吟蛩怨到微霜蘸影長堤水半塘苦調慣
依遷客笛嫁衣久疊女兒箱祇今揺落人悲宋猶憶蕭寥
賦學王

王粲有柳賦余丙寅歲途中亦作衰柳詩

未必陳根都委露春來依舊

簇花坊砧杵聲中正授衣良辰回首是還非卽看踈地垂
條盡尙擬漫天作絮飛愁惹館娃泪零落夢回板渚思依
稀雁門邇日音書滯試卜歸期幾載違弱態何曾解乞憐
無緣泪眼滯寒烟江淹賦就魂先黯霍玉愁深病轉綿蝶
瘦蜚寒幾知已桂濃楓醉共芳年堪嗟灞水分襟處無限
柔情古道邊四首首節諧婉含毫邈然雖未見深警之思
在閨閣中亦可稱合作矣

鄭雲蔭

鄭雲蔭字綠蓀荔鄉先生次女歸嚴應矩爲常山令以治

子婦有四時吟和殿仙妹韻云寒威消盡喜春晴便逗暄
和柳眼明芳草含烟先旖旎棠梨滴露乍淒清畫樓樹密
藏鶯語花塢香濃滯蝶情九十光陰如過電又聞社鼓一
聲聲梅子黃時天色晴前溪鷺宿白沙明千尋雲氣竒峯
湧一曲薰風溽暑清曲沼浮香蹇淨植方枰布子寄閒情
宵來乍覺涼生簟細聽芭蕉過雨聲爽氣宵澄宿雨晴芙
蓉紅映鏡中明雁來南國書猶杳菊到東籬影亦清湘女
水絃無限思鄂君翠被若爲情銀蟾萬里同孤照更奈寒
砧一片聲隴上尋梅雪乍晴霜侵寒月半樓明頻添獸炭

迎冬暖細聽鯨鐘入夜清刺繡自堪消短晷裹頭雅欲寄
詩情颼颼風過窗紗緊畏聽庭前促織聲

鄭青蘋

鄭青蘋字花汀荔鄉先生第三女歸國學生翁振綱爲舉
人基子婦有夏日詩云學飛乳燕繞回廊出水芙蓉冉冉
香曲院花凝晨露潤小窗人耐晚風涼蟬聲不隔千條柳
蛙吹時生半畝塘隱几橫斜書數卷了將清課日初長余
少時承有美明經荔香先生子以殘書相示曰此尙是吾先君
課女舊稿也中密圈小窗七字評云蘊藉今此紙不知落

誰手矣

鄭金鑾

鄭金鑾字殿仙荔鄉先生第四女歸諸生林守良爲選貢
生含光子婦有西爽齋存稿長江夜行云萬里秋逾遠霜
濃鳥自驚沙汀無限爽短葦有餘清江色涵山色鐘聲答
櫓聲客情偏耿耿漁火映窗明蓬萊閣觀海和韻云高閣
層巒上滄溟那有垠射工迎落日颶母類奔雲縹渺來三
島高寒到十分登臨餘感慨漁笛不堪聞寒食憶里門諸
姊云春陰四野柳依依天氣餘寒細雨稀善病怕逢飴粥

熟索居喜見雁書飛

新接福州建甯信

馬搖金勒行歌答人拾花

毬帶醉歸景物不殊同氣隔芳時偏與賞心違藻麗氣清

不愧家學

鄭詠謝

鄭詠謝字菱波又字林風荔鄉先生第六女歸儒士林天

木爲歲貢生長洵子婦余同年友泰順令軒開之母也以

泰順官 贈孺人有簪花軒閨吟研耕詩存其兄芥舟邑

侯天錦爲之序云當余居東省時吾妹方賦于歸畱膝下

觸目無非樂境凡所題詠皆怡悅之音比歸榕城妹壻端

卿好客恒觴我環碧軒中酒中輒出妹詩相示忽忽若昨
日事今重過其處園林如故風景頓殊遂令和鳴雅奏之
音化爲別鵠離鸞之曲矣

孺人嘗爲當道福夫人延入官廨課其女公子有紀事述
懷五古一首樸實言情能不懈而及於古非風雲月露之
詞可比也詩云人生固有命遇合亦靡常憶予初生日乃
在鄒魯鄉阿父時作守嬉戲趨黃堂稍長肄女訓紉佩莖
芷芳繡餘綴吟詠優游翰墨場封胡與過末弟妹隨肩行
阿父博一粲鹽絮分韻頗殷勤爲擇配言侍君子旁廿載

事中饋鴻案相與莊豈期丁薄祐鸞鵠不兩翔所天旣淪
沒慘毒摧心腸下顧黃口兒呱呱牽衣裳撫孤聖之教忍
死稱未亡邇來十數年舊廬日蕪荒拮据勞手口十指營
衣糲差喜鞠育遂有婦奉烝嘗其如家益落棲棲常弗遑
如彼鳥失巢而復謀稻梁意外值知己相招啟東廂夫人
實天人尺五近彼蒼世家信鼎貴德宇尤溫良鹿車泣海
國六珈耀煌煌冲懷習靜懿世俗邈莫量掌上雙明珠窈
窕鳴珩璜居然女博士執經待論商愧我非曹姑古義聊
與詳感君拂拭意期盡鞵線長彤史述賢媛庶幾慰所望

俯仰懷身世中夜恒傍徨長言寫情緒永念誌不忘

余同年泰順令蓼懷早孤弱冠卽以詩名實本母教也嘗
示余簪花軒閨吟研耕詩存有送芥舟伯兄歸建安云最
憐初束髮風木痛難除一別違庭訓誰能讀父書天乎偏
我奪壯也不人如學古關心切非君孰起予且住爲佳耳
胡然不肯畱江干數杯酒落葉一天秋遠道迢迢去西風
渺渺愁何時重把袂覩縷叙離憂清空如話一往而深集
中當以此爲上乘又送子度姪歸建安句云下第情懷初
中酒送行風物易銷魂又云孤棹白蘋衝水鳥秋風黃葉

上灘舟亦情景兼到之語也

鄭玉賀

鄭玉賀字春益荔鄉先生第七女歸監生陳華堂爲堂邑令琦子婦有和芥舟伯兄晚蘭韻云花信今朝已後期香

稱王者尙清竒紅芽漫憶千叢茂粉蝶猶餘兩翅差

蘇子由詩

仰羨飛鴻兩翅差

詞客鼓琴稱獨絕騷人結佩正相宜看君譜就

金蘭契桃李何嘗異昔時自注云時伯兄門下士和此題者以百計

鄭風調

鄭風調字碧笙幼鄉先生第八女歸陳廷俊爲國學生高
春子婦有和伯兄晚蘭韻云剩有古瓶相澹對最宜短鬢
與參差風調自好

鄭永紈

鄭永紈荔鄉先生第九女許字林天桓早殤十許歲詠桃
花句云施粉施朱紛作態乍晴乍雨爲誰開先生爲之不
樂果不克長成

林芳蕤

林芳蕤侯官人鄭翰蓴女江津令樾亭先生

喬蔭

編修香

海先生

謝蕃

之姊歸李開楚刑部主事

彥彬

山東都轉

彥

章

之祖母也有小西湖泛舟詩云迎仙門外波如鏡十里

芙蓉影相映鳳飛長在水晶宮轉瞬繁華非舊姓迴船一

繞水中山恍如鏡裏看青鬢游人那記樂游曲扣舷自和

漁歌閒澄瀾閣下梅花發宛在堂中吟社歇春水春風不

可畱大夢山頭上初月筆有遠致句有餘妍可入西湖詩

話又送鴻瑞鴻詩鴻夢三兒公車北上詩云年來衰病歎

支離捧檄何時遂所期萬里燕關魂夢裡魚書珍重莫教

遲庭闈歡聚知何日南北分歧悵遠天一別洪橋風雪冷

故園從此一懸後鴻瑞鴻萼皆作宰江南惟鴻詩先卒
鴻瑞卽蘭屏蘭卿之父也

林淑卿

林淑卿侯官人香海先生

對蕃

之女歸郭蓮渚比部

仁圖

早卒有紅餘僅存草一本乃蓮渚從廢簾故紙中檢存者
淑卿祖母鄭太宜人爲荔鄉先生姪女石幢先生女本工
詞翰淑卿得其門風遂好吟詠所著紅餘小草今多散失
有擬塞上曲云塞上胡烟不知里朔風揚沙迎面起百萬
貔貅出漢關手執烏號腰帶矢將軍一令重如山戰士螻

軀敢惜死最是蒼涼日落時胡笳四起客心悲鬼火星星
血凝碧殘蒿敗棘嗥狐狸憶昔軍書下軍府從征猛士虢
如虎大旂危立黑雲屯石頭城上驚鼙鼓妻孥親走送寒
衣欲訴離情語淒楚漢家懸金購首急骨肉婚姻顧不得
萬戶封侯且莫論但願玉關許生入何日龍城遠奏功捷
音萬里飛春風椎牛飲炙共慰勞家家重慶太平同擬古
便能近古非描脂畫粉者所能猝辦

何氏

何氏福州人歸李峻南有齋中口占一律云輕風颯颯拂

衣頻隔院蛩聲聽未真
薄醉祇緣花勸酒遲眠却似月留
人研池綠印窗前竹燭影紅搖鏡裡身
流水浮雲忙底事
閒消月夕共芳晨三四語爲時所傳誦

陳于鳳

陳于鳳字丹彩連江人陳昌明女歸閩縣林宏仁早卒有
蘭窗自怡草板燬於火僅存別山中小樓詩云十年坐卧
此山樓明月清風任去留黃卷能消終日悶青燈易動古
人愁也曾撫軫調山鳥幾度停梭看女牛一自餞春人去
後柴門空鎖舊林邱

黃淑庭

黃淑庭晉江人侍御黃岳牧女歸涿州牧吳世臣香山令

光祖之母也光祖之父提督公郡曾爲香山副將曾攜眷

屬之任及光祖令香山額署之西齋曰再至堂淑庭喜而

賦詩云累世簪纓資典優香山名邑喜重游當年功奏紅

苗格提督公以剿紅苗功陞副將此日誠從赤子求四代衣冠榮有自

萬家性命慮須周丁甯兒輩無他語清白無貽祖父羞雖

古名母之慈訓無以加此

吳素馨

吳素馨浦城人吳世臣女許字某氏未嫁而寡守節於母
家黃氏有和慈親題再至堂詩云七星峯下到何曾遠侍
護庭喜氣凝最是部民歌父母又聞輿頌憶高曾余曾錄
入南浦詩話朱秉鑑又據入柘浦詩鈔

許德馨

許德馨閩縣人江甯布政使

松估

孫女歸四川秦爲品運

司有新燕詩云飛來不識舊簾櫳玉剪初開試晚風正是
營巢春社後梨花庭院雨濛濛亦可入畫

許衡

福州許若洲歸吳門李春亨早卒有繡餘遺稿二卷附詩

餘一卷徐嬾雲

雲路

爲之序集中語多新穎如看月云耐

凉常廢寢欲缺每關情落葉云打窗醒夢蝶堆砌護寒蟲
秋園云總使秋園好看來亦可憐草枯依病蝶樹脫戀殘
蟬秋寺云菊色澹禪思蟲聲叅梵音無情唯古佛能耐寂
寥心秋海棠云一叢小院深深閉幾處無人澹澹粧殘梅
云高士病餘寒至此美人老去韻猶存杏花春雨詞云絕
似美人新送別亂拋紅淚立風前秋懷云不怕秋聲聽不
慣只愁無地種芭蕉

李若琛

李若琛歸連江王天位有蝶案香塵集清詞麗句足與左
芬侍史素心老人後先輝映余最賞其答戚友賀男士秀
游庠詩云自媿荆釵拙女紅漫承獎飾媿高風敢期虎氣
騰終上却信熊丸望未空啟蟄爭言龍角聳將雛有待鳳
毛翀何當再作竿頭進少慰寒機十載衷

連江縣志云李若琛知詩事姑孝有家貧無計可承歡之
句姑病慕羊羹丐於鄰得羊腥少許撒草薦熟之姑髮叢
虱不可除則傅薊膏於已髮以引之病者霍然夫習舉業

而嗜博不專常作詩以諷之

姜氏

姜氏其先浙人徙居福州歸副舉人何秀巖岐海廣文之
母也有紉蘭閨雜詠附見秀巖孺慕軒詩集中曉起云漏
盡春眠足驚聞鳥雀喧蘭閨爭早起記取弋鳬言理髮云
理髮添膏沐簪花貼淺紅兒夫游不遠無事歎飛蓬拂鏡
云拂鏡知顏瘦厭將脂粉華雙鬟強解事每日進鮮花登
樓云明媚晴光好春風獨上樓何因嬌少婦柳色忽牽愁
眼前景寫來亦足以覘德性

力氏

侯官力氏字玉娟儒士嚴溥室林敬廬先生之表親也先生介石堂文鈔中有嚴母力孺人墓志稱力孺人言談舉止無一不中節間爲小詩亦多可觀今只存輓烈婦葉應珪一絕云雖然含笑入泉臺知是傷心百念灰臨訣未曾畱一語斷腸盡付杜鵑哀

薩蓮如

蓮如薩氏雁門天錫之裔農部龍光之第十女也歸孝廉林星海林固知詩蓮如與之唱和多雅音自題其居曰挽

鹿有挽鹿山莊詩草一本過黑龍江遇風云鷓鴣聲裡雨
和煙極目蒼茫水接天到此欲歸歸不得扁舟兀坐日如
年落花寄外云江南有客夢初醒烟雨濛濛悔遠征日暮
前山餘碎綠可憐費盡鷓鴣聲觀唐人秋狩圖云遼海暗
愁塵原頭萬幕陳琬戈迎月小寒劍拂霜新蒼隼扶雲下
窮猿失木暝秋郊餘獸盡莫更再圍春皆有唐人格調蓮
如嘗受業於姚履堂邑侯履堂殉節蓮如有詩哭之云吾
師素志本橫行窮海何年此恨平倘使孤軍出遙島豈憂
強寇入重城

師宰定海聞寇將入請於鎮戎某以兵衛某
遂巡不戰亡去師募鹽哨百餘人拒南門終

日城陷遂以身殉

倉皇拒敵嗟何及慷慨捐軀志已成一片丹心

常照日九原含笑尚談兵

余常夢師坐擁六韜陰符諸書含笑以示

闡揚忠藎

字字沈着履堂真可含笑九原矣

廖氏

廖氏福州人進士廖玉麟女歸連江余樞元早寡樞元應試罷歸有詩勉之云半畝生涯在鋤陰復課晴春風當再至端不負深耕樞元卒以身殉